

Bukan laluan mudah: Sulaiman



Sulaiman (dua kanan) bersama-sama Tengku Hazman Raja Hassan serta kedua-dua kapten pasukan pada sidang media perlawanan akhir kedua Piala Cabaran 2018, semalam.

KETUA jurulatih UKM FC, Sulaiman Hussin mengakui bakal berdepan laluan sukar untuk melunaskan misi merebut kejuaraan edisi pertama Piala Cabaran ketika turun bertemu Terengganu FC II (TFC II) dalam aksi final kedua di Stadium Sultan Ismail Nasiruddin Shah, malam nanti.

Menurutnya, beraksi di gelanggang sendiri mahupun di tempat lawan tidak memberi sebarang tekanan buat pasukan sebaliknya menuntut pemainnya memperagakan aksi terbaik mereka sepanjang perlawanan itu nanti.

"Apa yang penting kami datang ke sini bukan untuk berjalan-jalan sebaliknya membawa misi penting untuk menjulang kejuaraan walaupun tuan rumah memiliki kelebihan dua desifit gol di tempat lawan.

"Jadi kami akan berusaha untuk

memadamkan kelebihan jaringan itu dan memanfaatkan sebaik mungkin ruang yang ada untuk meraih kemenangan," katanya.

Dalam pada itu, Sulaiman turut menyifatkan Piala Cabaran sebagai medan terbaik buat pemainnya untuk mengembangkan karier bola sepak masing-masing ke tahap lebih tinggi pada masa akan datang.

"Ini adalah peluang terakhir buat pemain untuk menonjolkan kemampuan masing-masing dan saya tidak keberatan untuk melepaskan mereka sekiranya disunting oleh pasukan yang lebih baik untuk musim depan.

"Malah saya juga berbangga apabila ada beberapa kelab sudah mula menunjukkan minat mereka untuk menggunakan khidmat pemain UKM FC pada musim akan datang," katanya.